

編號 5 號

【金蘋果】郭亭好原作

佢當驚注射，你係毋係也摻佢共樣呢？為著治理這站時間減耍人¹个惡霸——流感病毒，診所肚排淦淦等等愛注預防射个大人細子。細人仔驚到噉噉滾、噉到目汁濫汨，看著恁樣个情景，分佢想起頭擺，該隻驚注射个佢，還過乖乖注射了後斯有个「金蘋果」。

屋下肚正佢一個妹仔，阿爸講佢這隻心肝妹屎係佢摻註生娘求來个。佢若係去外地出張，轉該時定著會跔跔迂去雜貨店買兩罐佢當好食个蘋果牛乳——「金蘋果」轉來分佢食。毋過佢從細斯嘴毋穀²，歸隻人像瘦猴仔樣，略略斯發病仔愛看醫生；阿婆毋盼得，講：「你看哪！細人仔畜到瘦夾夾咧，又長下發病仔，這愛仰般撚正會大？」阿爸摻等佢該時也講：「你看，你个腳像鳥腳樣，無細義分人拗一下斯會斷忒哦！愛食加兜正會大，知無？」

有一擺佢作燒，燒到歸身軟怠怠，在眠床摻等被，冷到激激顫。阿爸對外背轉來看著，黏時斯摻佢背起來，走等去醫院尋醫

生，醫生看了講：「還係愛注一支射較遽好！」聽著愛「注射」，原旦還手軟腳犁个佢，跋起腳斯愛走，連鞋跌忒也毋管咧！阿爸遽遽追來摻佢揪等，摻轉去凳頂坐；佢一幹頭，看著護理師擎等一支大大支个注射筯在該抽藥水，阿姆哀哟！該佢會死咧！黏時斯在阿爸膺身頂緊奮，毋過阿爸生來盡高大，佢斯像分佛祖砣在五指山下个孫猴精，仰般都走毋出佢个巴掌嫵。

看著毋像勢咧，佢斯開始另命大噉，佢兜哪有可能恁樣斯放佢過？阿爸出力摻佢摻等，過摻佢兩隻腳夾纏，護理師也當遽手，一個摻佢个褲頭拉較落兜、一個注射，黏時斯完成佢兜个任務咧！單淨留噉到凜流凜串个佢，伏在阿爸肩頭緊躡噉³。阿爸細細聲溫柔个哀奶⁴佢講：「毋好噉咧，恁樣當見笑哦！你當慶，為著獎勵你，等下阿爸渡你去買你最好食个『金蘋果』分你哦！」

在轉去个路項，阿爸用佢該又貴又燒暖个手摻佢牽核核，佢个嘴町咁等張有阿爸淦淦愛个「金蘋果」，頭下注射个痛做下毋記得咧。佢想，該兩時个佢怕係全世界最幸福个人咧！想起來，也好得有「金蘋果」陪佢耐過該段驚注射个童年。

¹ 減耍人：音 med sa^ˇ ngin；戲弄人。

² 嘴毋穀：音 zhoi^ˇ m gug；食慾不振。

³ 躡噉：音 sud^ˋ ed；泣不成聲。

⁴ 哀奶：音 oi^ˋ noi^ˋ；安撫。

編號 6 號

【客家烏鵲阿醺】巫沂庭原作

佢做細人个時節，畜一隻得人惜到耐毋得个烏鵲。雖然佢離開佢去做仙拗蠻久咧，毋過佢心肝肚永久會留一隻思念个位所分佢。見擺在腦膈肚無意中瞞過頭擺摻佢相處个種種，艱苦个心情斯一陣一陣湧起來，淦淦脹脹，像硬硬¹會淖出來樣。

小學三年生該時，有一日，戴在共莊頭个姨丈對佢做事个所在——金山，帶轉三隻盲生幼毛个細烏鵲。「唉哦！做麼个有恁得人惜个鳥仔？」阿爸忍毋核安腦講。「分佢兜一隻來畜好無？」阿爸摻姨丈要求。

「好啦，自家擇一隻轉去畜。」姨丈有一息毋盼得講。

斯恁樣，這隻鳥仔開始摻佢兜共下做伴，有佢兜个所在，總係有佢細細隻个身影。在佢兜細心細意个照顧下，阿醺生到結實又硬程。阿姆成時會切兜幼豬肉絲分佢食，所以佢个毛看起來還較烏金合靚。因為佢个臉身圓滾滾，所以佢摻佢安一隻得人惜个名仔——「阿醺」。

聽人講烏鵲曉得學人講話，阿爸毋知哪時斯走去市場買隻按

舌枋²偷因轉屋分阿醺觜，像有影樣，阿醺當像緊來緊會學人講話咧呢，還生趣哦！

阿爸、阿姆原旦戴在東勢該片，因為阿爸想愛開店做生理，佢心肝肚想，毋好掉忒³屋下一個人創業，斯將就渡歸屋人上臺北定貼下來。雖然離開東勢恁遠，毋過佢兜從來毋識毋記得祖宗言。打幫爺哀个堅心，一溜佢兜用大埔腔摻佢兩隻細人仔教到曉講客，今晡日佢有機會摻客話傳承分後輩，全愛承蒙佢个爺哀。還使講，家庭係傳承母語盡好个地方，仰般講都毋好放忒正好。

佢兜乜教阿醺講客，佢講著已正，唉哉，根本就係一隻客家烏鵲啊！成時阿爸睡當晝有人客來个時節，阿醺看阿爸還睡等無停動，斯玄風嘶肱另命，一到又一到喊阿爸个名，直直喊到阿爸精神咧，佢正恬恬無過出聲。這下佢兜正發現阿醺還會搨做生理呢，唉唷，做麼个會恁慶腳啦！

當希望時間頓恬在阿醺還在該時，有佢做伴个時節，佢兜逐日過到歡喜合暢樂。前前後後佢陪佢兜總共有十五隻年頭，實在貼心正得！逐擺想著佢得人惜个樣仔，都會摻佢歸隻心肝揪到纏纏，毋得伸揸⁴。想愛在心肝肚細聲摻阿醺講一句：「承蒙！佢个青春有你做伴，正來寮。」

¹ 硬硬：音 ngiang' ngiang'；即將要。

² 按舌枋：音 no shad' biong'；磨舌板。

³ 掉忒：音 tiau' ted；丟掉。

⁴ 伸揸：音 chun' cha'；平順。

編號 7 號

【風搓日】張慈媛原作

還細時節，見擺堵著風搓日，就係佢爸愛出門整電火樁¹个日仔，乜係歸宿舍婦人家摻細人仔共下搵手接電話个日仔。

佢爸在臺電食頭路，整電火樁个時節，愛摻腳踏釘插落逐隻空仔裡肚，正做得手爬腳蹶上去頂高做事。堵著風搓日又係風又係水，一下仔就無電咧。臺電个工作人員接著電話，就愛煞煞著水衣去修理。在電火樁頂高涿水搶時間，該斯正經愛請佛祖保佑，正好安全下來。

老古人講：「七月落水又起風，十隻柑園九隻空。」一隻風搓落來臺灣，電線分佢吹壞忒，臺電服務所个電話就毋識停過。工作人員做下出去修理搶通電，辦公室既經無人咧，電話還係響毋會煞，麼人去接？就係佢兜戴在宿舍个家眷。男仔人出去修理，婦人家帶等細人仔全部在辦公室輪等接電話。打電話來个人，大體係打來罵人个，問講：「做麼个佢這片个電還宕來？佢魚塘裡肚个魚仔會死忒咧！」佢心肝肚想，恁暗个夜，佢爸在風雨裡肚个電火樁頂高，佢也當想佢爸平平安安煞煞轉來。新聞主

播在電視裡肚提醒大家，係無要緊个事情莫出門；佢爸嘎顛倒愛遽遽出門。

俗話講：「風來從風，雨來從雨。」年堵年來拜訪个風搓，教佢兜仰般接待這隻逐年來个人客。該兩時，氣象報告係通知有風搓愛來咧，大家定著愛用踢埔²貼窗門，煞猛準備蠟燭、泡麵，還有餅仔這兜較燥又耐放个東西，續下來還愛承水。因為風搓來就表示會漚水、蔭水、停電，成時還會停水。幾下日無法度出門，所以，一屋人生活需要个東西愛準備好勢。

社會緊來緊進步，風搓來以前，政府會提醒大家，莫行兼海脣，戴在山區个人愛注意屙泥落石³，社會大眾个安全漸漸仔分人重視。祝福每一個人像佢爸樣，逐擺就平安轉屋下。

¹ 電火樁：音 tien⁺ fo⁻ dun⁺；電線桿。

² 踢埔：音 ted bu⁻；膠帶。

³ 屙泥落石：音 o⁻ nai lau⁺ sag；土石流。